

BOSNA I HERCEGOVINA
FEDERACIJA BOSNE I HERCEGOVINE
VRHOVNI SUD
FEDERACIJA BOSNE I HERCEGOVINE
Broj: 53 0 P 053879 17 Spp
Sarajevo, 17. 11.2017. godine

Vrhovni sud Federacije Bosne i Hercegovine, odlučujući po zahtjevu Općinskog suda u Čapljini za rješavanje spornog pravnog pitanja, na osnovu odredbe člana 61. Zakona o parničnom postupku („Službene novine F BiH“, broj: 53/03, 73/05, 19/06 i 98/15 - u daljem tekstu: ZPP), te odredbe člana 18. Pravilnika o unutrašnjem sudskom poslovanju Federacije Bosne i Hercegovine i Brčko Distrikta („Službeni glasnik“ broj: 66/12 i 40/14) na sjednici Građanskog odjeljenja održanoj dana 17.11.2017. godine donio je sljedeću:

ODLUKU

Odbacuje se kao nepotpun zahtjev Općinskog suda u Čapljini za rješavanje spornog pravnog pitanja.

Obrazloženje

Općinski sud u Čapljini zahtjevom za rješavanje spornog pravnog pitanja sadržanom u njegovom dopisu broj: 53 0 P 053879 16 P 2 od 18.09.2017. godine je pokrenuo postupak pred Vrhovnim sudom Federacije radi rješavanja spornog pravnog pitanja u smislu člana 61.a. stav 1. i člana 61.b. stav 1. Zakona o parničnom postupku („Službene novine FBiH“ broj 52/03, 73/05, 19/06 i 98/15 u daljem tekstu ZPP), u vezi sa primjenom Zakon o izvršnom postupku („Službene novine FBiH“, broj: 32/03, 52/03, 33/06, 39/06, 39/09, 35/12i 46/16 - u daljem tekstu: ZIP).

Uz zahtjev je dostavljen „Podnesak tužitelja - Prijedlog za rješavanje spornog pravnog pitanja“, u kojem se kao sporno pravno pitanje naznačava:

„a to je pitanje zakonitosti postupka i donošenja retroaktivne izmjene Odluke Federalnog stožera, odnosno ustavnosti, zakonitosti ili nezakonitosti/ništavosti donošenja Odluke o stavljanju van snage Odluke Federalnog štaba civilne zaštite o povratu finansijskih sredstava dodijeljenih kao jednokratna novčana pomoć za saniranje šteta Općini Čapljina broj: 12-02/10-588-13/15 od 08.12.2015. godine, te zakonitosti postupanja Općine Čapljina kroz više godina držanje novčanih sredstava namjenske prirode na svom računu i njihove neisplate oštećenim poljoprivrednicima.“

Nije dostavljen i spis toga suda broj: 53 0 P 053879 16 P 2.

Zahtjev takođe ne sadržava:

- kratak prikaz utvrđenog stanja stvari u konkretnoj pravnoj stvari,
- navode stranaka o spornom pravnom pitanju i razloge zbog kojih se obraća sa zahtjevom za rješavanje spornog pravnog pitanja,

niti je uz zahtjev sud priložio sopstveno tumačenje spornog pravnog pitanja.

Podnosilac u zahtjevu navodi da je kod tog suda u toku parnični postupak u pravnoj stvari tužitelja: Blago Jurković, Gabela Polje, Općina Čapljina, zastupanog po punomoćniku Ivanu Herceg, advokatu iz Ljubuškog, protiv tuženih: 1. Općina Čapljina, Trg Kralja Tomislava Čapljin, zastupane po općinskom javnom pravobranitelju Aniti Perić i 2. Federacija Bosne i Hercegovine, Vlade Federacije Bosne i Hercegovine, Federalni štab civilne zaštite, Ulica Alipašina br. 41 Sarajevo, zastupane po Federalnom pravobraniteljstvu, radi isplate, v.s. 93.044,47 KM, u kojem postupku je rješenjem Kantonalnog suda u Mostaru (broj: 53 0 P 053879 14 GŽ od 19.03.2016. godine) ukinuta prvostepena presuda (presuda Općinskog suda u Čapljini broj: 53 0 P 053879 14 P od 28.08.2014. godine) u dijelu kojim tužitelj traži da mu tuženi isplate traženi iznos na ime naknade štete, koji tužbeni zahtjev tužitelj zasniva i koji da proizlazi iz Odluke o odobravanju jednokratne novčane pomoći za saniranje štete općinama: Tuzlanskog, Zapadno hercegovačkog, Bosansko-podrinjskog, Zeničko-dobojskog, Hercegovačko-Neretvanskog kantona broj: 01/11-49/02-651-2/122 od 28.11.2012. godine, koju je donio tuženi preko Federalnog štaba civilne zaštite.

Općinski sud u Čapljini, kao podnosilac zahtjeva za rješavanje spornog pravnog pitanja, smatra da je prijedlog tužitelja za rješavanje spornog pravnog pitanja utemeljen, a posebno iz razloga što je, kako navodi tužitelj, više općina po istoj odluci isplatilo naknadu štete.

Zahtjev Općinskog suda u Čapljini za rješavanje spornog pravnog pitanja je nepotpun.

Cijeneći da u postupku pred Općinskim sudom u Čapljini u većem broju predmeta postoji potreba da se zauzme stav o izloženom spornom pitanju koje je od značaja za odlučivanje o predmetu postupka pred prvostepenim sudovima, iz kojih razloga je Općinski sud u Čapljini zahtjevom pokrenuo postupak pred Vrhovnim sudom Federacije Bosne i Hercegovine radi rješavanja navedenog spornog pitanja, navodeći kako je izloženo, ne dostavljajući i spis toga suda broj: 53 0 P 053879 16 P 2, kratak prikaz utvrđenog stanja stvari u konkretnoj pravnoj stvari, navode stranaka o spornom pravnom pitanju i razloge zbog kojih se obraća sa zahtjevom za rješavanje spornog pravnog pitanja, pri čemu uz zahtjev sud nije priložio sopstveno tumačenje spornog pravnog pitanja, dostavljajući i predmet, Vrhovni sud Federacije Bosne i Hercegovine, Garađansko odjelenje Vrhovnog suda federacije BiH Vrhovni sud Bosne i Hercegovine nalazi da je navedeni zahtjev za rješavanje spornog pravnog pitanja nepotpun, koji se kao takav, saglasno odredbi člana 61c. u vezi sa članom 61b. stav (1) i (3) ZPP-a, imao odbaciti.

Predsjednica Građanskog odjeljenja
Zdravka Grebo Jevtić, s.r.